

Na osnovu člana 94. stav 2. Statuta Univerziteta u Novom Pazaru, Senat Univerziteta u Novom Pazaru na sjednici održanoj 27. marta 2014. godine, donosi

P R A V I L N I K **o dodjeli počasnog doktorata**

Član 1.

Ovim Pravilnikom uređuju se uslovi i postupak za dodjelu počasnog doktorata Univerziteta u Novom Pazaru (u daljem tekstu: Univerziteta).

Član 2.

(1) Univerzitet može dodijeliti počasni doktorat istaknutoj naučnoj, kulturnoj i drugoj javnoj ličnosti iz zemlje i inostranstva za izuzetan doprinos u pojedinim oblastima nastavnog, naučnog, istraživačkog i umjetničkog stvaralaštva koji je značajno doprinio unapređenju visokog obrazovanja, nauke, tehnike, tehnologije, kulture ili umjetnosti, kao i za afirmaciju i širenje ugleda Univerziteta i visokoškolskih i drugih jedinica u sastavu Univerziteta.

(2) Univerzitet može dodijeliti počasni doktorat i strancu.

Član 3.

Odluku o dodjeli počasnog doktorata donosi Senat Univerziteta.

Član 4.

Obrazloženu inicijativu za dodjelu počasnog doktorata može dati nastavno-naučno vijeće departmana odnosno odgovarajući stručni organ naučne ili druge jedinice Univerziteta.

Član 5.

(1) Ako prihvati inicijativu iz člana 4. ovog Pravilnika, Senat Univerziteta može obrazovati komisiju za pisanje izvještaja o kandidatu i utvrđivanje obrazloženog prijedloga za dodjelu počasnog doktorata ili pisanje izvještaja može povjeriti podnosiocu inicijative za dodjelu počasnog doktorata.

(2) Komisija iz stava 1. ovog člana sastoji se od tri do pet profesora, odnosno viših naučnih saradnika i naučnih savjetnika.

(3) Izvještaj o kandidatu sadrži: biografske podatke; bibliografske podatke; mišljenje o naučnom, odnosno umjetničkom i stručnom radu; ocjenu doprinosa kandidata unapređenju naučne misli kao i doprinosa razvoju visokog obrazovanja, naučnog, istraživačkog i umjetničkog stvaralaštva odnosno unapređenju tehnologije tehnike i kulture; ocjenu doprinosa kandidata afirmaciji, širenju ugleda i unapređenju rada i razvoja Univerziteta i visokoobrazovnih i drugih jedinica u sastavu Univerziteta i obrazloženje razloga zbog kojih se predlaže dodjela počasnog doktorata.

Član 6.

Dodjelom počasnog doktorata kandidat stiče pravo na promociju za počasnog doktora i pravo na diplomu o sticanju počasnog doktorata.

Član 7.

(1) Promociju počasnog doktora obavlja i zakazuje rektor.

(2) Promocija počasnog doktora je javna i obavlja se na svečanom skupu kome predsjedava rektor.

(3) Rektor vrši promociju počasnog doktora u prisustvu prorektora i šefova departmana u sastavu Univerziteta.

(4) Rektor saopštava razloge zbog kojih je predložena dodjela počasnog doktorata, a zatim lice koje rektor odredi saopštava kratak izvještaj o kandidatu i odluku Senata Univerziteta o dodjeli počasnog doktorata i počasnom doktoru uručuje diplomu.

Član 8.

- (1) Diplomu o sticanju počasnog doktorata izdaje Univerzitet.
- (2) Diplomu potpisuje rektor.
- (3) Diploma se ovjerava suhim žigom Univerziteta.
- (4) Sadržaj i oblik diplome o sticanju počasnog doktorata utvrđuje rektor.

Član 9.

Univerzitet vodi evidenciju o počasnim doktorima koja se trajno čuva.

Član 10.

Ovaj Pravilnik stupa na snagu danom donošenja.

Ovaj Pravilnik objavit će se na internet stranici Univerziteta i dostaviti visokoškolskim i drugim jedinicama Univerziteta.

PREDSJEDNIK SENATA - V.D. Rektor
Prof. dr Suad Bećirović